



17. august 2012

UKA 2012/26

12. august 2011

UKA 2011/77

Inatsisartut Suleriaasianni § 35 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatsinni Angajoqqaat Oqartussaaffiisa annertunerulernissaat ersarinnerulernissaallu anguniarlugu "Angajoqqaat Peqatigiiffiannik" taaneqartumik Atuarfitsialammi inatsisip § 40-41-42-p Atuarfiup siulersuisuinut inatsimmut ilanngussinissaq pillugu apeqquteqaat aallaavigalugu oqallisigineqarnissaannik siunnersuut.

(Inatsisartunut ilaasortaq, Ruth Heilmann Siumut)

Tungavilersuut:

Naalakkersuinikkut sulinitsinni tamarluinnatta angajoqqaat nukissaqarluartut aammalu meeqqanik paaqqutarinnilluarsinnaasut nukittorsarumavagut.

Angajoqqaat meerartami susassaqaarfiini sunniuteqaqataanissaat sapinngisamik annerpaaq ujartugassaraarput aqutissiuutassaralugulu.

Kultureqarnermi, Ilinniartitaanermi, Ilisimatusarnermi Ilageeqarnermilu ataatsimiititaliami upernaag manna inatsisartunut allakkat tigusatta ilagaat 31. marts 2011 ullulernerqartumi IMAK-imit allakkat IMAK-p ataatsimeeqatigineqarnerani tunniunneqartut soqutiginarlutit tassani saqqummiunneqartut arlaqartut ilagaat:

"Atuarfiup Siulersuisuisa akisussaaffiinnut tunngasut peqqussutit nunatsinnut tulluarsarlugit nutarsarneqarnissaannik kissaat".

Allakkami ima oqariartortoqarpoq, issuagaq:

"Nuna tamakkerlugu atuarfiup siulersuisuinut/angajoqqaanut peqatigiiffiliornissaq, taamaaliornikkut angajoqqaat pinngitsoorani tusarniaavigineqartarnissaat aalajangeeqataasarnissaallu qulakkeerneqassaaq".

Akulikippallaartumik angajoqqaat pisunut isiginnaartuinnartut misigisimasarput, tassalu inatsisilianut nutaanut sumiiffimminnilu pisarialinnik tulleriarnermi assigisaanullu piginneqataangitsut sunniuteqartinneqarnerat annikippallaarmat tusaaneqangitsut misigisarlutik, tamanna akisussaaqataangitsut imminnut isigilersinnaaneranut qanittorujussuvoq.

IMAK ima ingerlaqqippoq, issuagaq:

"Atuarfiup siulersuisortaavisa kursusertarnissaat. Sumiiffippassuarni atuarfiup siulersuisuisa suut piginnaatitaaffigissallugit nalornisarpaat, ajoraluartumilli atuarfiit ataasiakkaat pisortaanut ilinniartitsisunullu sulisitsisutut imminnut isigineq atorneqartorujussuvoq, uffa atuarfimmini

pingaarnertut suut naleqartissallugit/pingaartissallugit iliuuseqarfiginiartussaallugillu suliaassaralugit”.

IMAK-p ataatsimiititaliami naapinnerani inatsisartunut angajoqqaat oqartussaanerulernissaanik suliniuteqarnissaq pingaartillugu inatsisartunut oqaluuserineqarnissaanik maanna siunnersuut ingerlateqqippara.

Ullumikkut meeqqat pisinnaatitaaffii meeqqanik ilisimaarineqarnerulernissaanik suliniutit ingerlanneqartarnerini angajoqqaat aamma peqataanerulernissaat pisariaqartuuvoq pingaarlunilu. Angajoqqaat aamma pisinnaatitaaffeqarmata. Arlaatigut meeqqat atuartut pineqartillugit qularutissaanngitsumillu aamma meeqqerivitsialak pineqartillugu angajoqqaat nuna tamakkerlugu angajoqqaat oqaaseqartartui amigaataasartorujussuusut isumaqarpunga.

Annerusumik tusartarparput angajoqqaanut ataatsimiititsisoqaraangat ikippallaat najuuttarneri. Annerusumik angajoqqaat namminneerlutik isumaannik ataatsimoortumik oqariartuutitik tusagaqartarnissaq taamaalilluni assut maqaasinartarpoq. Taamaattumik ”*Angajoqqaat Oqaaseqartuunik*” nunatsinni peqalernissaq pisariaqarpoq, angajoqqaat isumaasa tusarfigineqartarnissaat qulakkeerniarlugu.

“*Angajoqqaat Peqatigiiffiannik*” peqalerpat eqeersimaartumik meerartavut pillugit aammalu perorsaanikkut suliniarnermi iluaqutaasumik kinguneqarsinnaasoq isumaqarfigigaara.

Taamaattumik inatsisartut apeqquteqaat aallaavigalugu torersumik eqeersimaartumillu oqallilluarnissaannik kissaappakka qilanaarpungalu isummersuutissi tusarnissaannut.